



**UPA 2014/129.1**  
**29.04.2014**

Naaja H. Nathanielsen

**Uunga siunnersuut: Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinnissaa pillugu nr. 6 5. december 2008-imeersoq Inatsisartut inatsisaat nr. xx, xx.xxxx-imeersoq**

(Inuussutissarsiornermut Aatsitassanullu Naalakkersuisoq)

Inatsimmut matumunnga tunngatillugu Naalakkersuisut akissuteqaataanni oqaasertaasut Inuit Ataqatigiit tungaannit tupigusuutigingaarpagut. Malunnarpoq allanngortitsinissamut matumunnga Naalakkersuisut akerliusut ukiarmilu Naalakkersuisut siunnersuutaat Inatsisartunit itigartinneqartut ullumi oqaluuserisassagut Inatsisartut taamanikkut allanngortikkusummatigit. Naalakkersuisulli akerliliinnerminni tunngavilersuutitut atugaat paasissaangillat. Oqaaseqaatitut inatsisinut naapertuunnersut Inatsiartut allattoqarfianut tusarniutigineqannginnerminni misissorneqarsimangillat. Oqaaseqaatini ersepoq naalakkersuisut illuinnaasiortumik auersaanngitsumillu inatsissatut siunnersuummut isummersimasut. Tamanna naammaginangilaq pissusissamisooranilu. Inuit Ataqatigiinniit Naalakkersuisut eqqaasikkusuppagut Inatsisartut tassammata Naalakkersuisunik sulisitsisut.

Aappassaaneerineqannginnerani siunnersuut Aningaasaqarnermut Akile-raartarnermullu Ataatsimiititaliamut suliarisassanngortillugu Inuit Ataqatigiit innersuupparput inatsisissatullu siunnersuutip kingunissai pillugit ataatsimut paaseqatigiinniartoqassasoq ataatsimiititaliaq sakkortuumik inakkusupparput Naalakkersuisunik oqaloqatiginnilluaqqullugu. Aatsitassarsiornermut suliaasaqarfittut ittumut taama pingaaruteqartigisumut atatil-lugu naapigiaalluta isumaqatigiissusiornissarput isumaqatigiissaanissar-pullu tulluarnerpaassaaq. Ataatsimiititaliaq Inuit Ataqatigiinnit qinnuigis-savarput Naalakkersuisut akissuteqaataanni saqqummiunneqartut isum-mersorfigeqqullugit.

-Siunnersuutigineqartup tunngavippiamigut pisut soorlu timersortarfimmi iliuseqarnerit aatsitassarsiornermi aningaasaateqarfimmi isertitatut naatsorsuussaassanersut. Naalakkersuisut kissaatigaat timersortarfik taamatut isertitatut naatsorsorneqassasoq.

Inuit Ataqatigiit tamssumunnga isumaqataangillat. Ukiarmilu Inatsisartut sinneri aamma taamak isummerput. Akileraarnikkut akitsuusiinikkullu isertitat allanut aningaasaliissutigisinnaangorlugit atorneqarsinnaapput taamaalillunilu isertitaqarnissamut tunngaviusinnaallutik. Takkulu isertitat nutaanik pisortuutigisinnaavagut imaluunniit Naalgaaffimmiit akisussaaffinnik tigusinermut atorsinnaallugit. Timerortarfik taamatut atorneqarsinnaangilaq. Sananeqaruni sumiiffinni innuttaasunut iluaqutaassaaq. Taamakkaluartorli aamma kommunimut ingerlatsinikkut aningaasartuutinngussaaq. Ukiullu ingerlaneranni naleeruttussaalluni. Tamaalilluni aningaasartuutinngussaaq. Sooq aatsitassarsiornermi aningaasaateqarfimmut sanaartukkanik ilanngussissuugut, uffa taakku naleerukkiartortussaasut.

Kiisalu Inuit Ataqatigiit tungaannit isorissavarput aatsitassarsiornermi aningaasaateqarfiup iluanaarutaanik taamaallaat atuisarnissarput Inatsisartu- ni amerlanerussuteqartut imminermut pisussangortikkusunngimmassuk. Uagut paasinninnerput malillugu tassaniippoq aatsitassarsiornermi aningaasaateqarfiup ajutooratarsinnaanerpaaffia. Tassa aningaasaateqarfik tassaaginnalissasoq værskoorfik kinguaassagut eqqarsaatigillannguarnagit politikerit kusanartorsuarnik sinnattugaqartut aningaasanik aallertarfis- saat. Aatsitassarsiornermi aningaasaateqarfiup pisuussutai taamaasillutik ikiligaluttuinnalissapput kinguaassattalu pissaat taamaaqataanik ikiligalut- tuinnassallutik. Kisiannili tassa aningaasaateqarfiup iluanaarutaanik taa- maallaat atuisarnissarput pillugu Inuit Ataqatigiit ukiarmi siunnersuuterput amerlanerussuteqartut itigartikkusussimavaat. Taamaamat tupinnarpoq aningaasanik toqqorsissullugit piumanngeriarlutik Naalakkersuisut maanna oqalulermata kinguaassatsinnut toqqorsissutissagut tassaassasut illutoq- qat.

Taamatut oqaaseqarluta sammisarput siunissami iliuuseqarnissamut peri- arfissatsinnut taama pingaaruteqartigisoq pillugu Inatsisartut oqallilluar- nissaannik kissaappagut.